

Harian Metro
m/s 45
09/03/2017

Bisnes
Pengarang: Nasharuddin Muhammad

Tel: 1300-22-6787 samb: 4918 @bisnesHM Emet: bisnes@hmetro.com.my



HAMZAH (tengah) menyaksikan pertukaran dokumen kerjasama di antara Ahmad Saruji (dua dari kiri) dengan Ketua Pegawai Eksekutif Kumpulan Pos Malaysia Berhad, Datuk Mohd Shukrie Mohd Salleh di Kuala Lumpur, semalam.

JANGKA RM4 BILION

MAAB, Pos Malaysia jalin kerjasama untuk pengurusan wasiat

Syarifah Dayana Syed Bakri
dayana@hmetro.com.my

Kuala Lumpur

MyAngkasa Amanah Berhad (MAAB), agensi di bawah Angkatan Koperasi Kebangsaan Malaysia Berhad (Angkasa) memeterai kerjasama dengan Pos Malaysia Berhad (Pos Malaysia) untuk pengurusan wasiat.

Melalui kerjasama itu, MAAB mengunjur untuk menguruskan wasiat dengan aset terkumpul mencecah RM4 bilion dalam tempoh setahun.

Ketua Pegawai Eksekutifnya Datuk Ahmad Saruji-Ahmad Aziz berkata, sasaran itu dijangka mampu dicapai memandangkan Pos Malay-

sia mempunyai banyak saluran selain perkembangan positif yang ditunjukkan melalui program perintis dijalankan.

"Projek perintis dijalankan di 11 pejabat pos dan ia merekodkan sehingga 113 sijil wasiat dengan aset terkumpul bernilai RM40 juta.

"Ia akan diperluaskan ke 587 pejabat pos di Semenanjung dan menjangkakan angka berkenaan akan mencecah 1,000 pendaftaran baru wasiat dalam tempoh setahun dengan nilai mencecah RM4 bilion," katanya selepas pelancaran kerjasama antara MAAB dan

Pos Malaysia di sini, semalam.

Majlis itu disaksikan Menteri Perdagangan Dalam Negeri, Koperasi dan Penggunaan Datuk Seri Hamzah Zainudin dan Presiden Angkasa Datuk Abdul Fattah Abdullah.

Beliau berkata, melalui program perintis berkenaan statistik jualan bagi segmen penjualan wasiat dan rujukan di Pos Malaysia meningkat sehingga 100 peratus.

"Malah, ia turut mencatatkan peningkatan lebih tinggi setiap bulan sejak diperkenalkan dan kami berharap trend berkenaan akan

konsisten pada masa akan datang," katanya.

Menurutnya, pengurusan wasiat itu tidak terhad kepada individu beragama Islam semata-mata kerana ia juga terbuka kepada mereka yang bukan Islam.

"Pengurusan wasiat tidak hanya terhad untuk mereka yang beragama Islam kerana ia terbuka kepada mana-mana individu.

"Ini kerana kami menyediakan perkhidmatan penulisan wasiat untuk individu Islam dan wasiat konvensional untuk mereka yang bukan beragama Islam," katanya.

Ahmad Saruji berkata, selain perkhidmatan pengurusan wasiat, pihaknya turut menawarkan khidmat pengurusan amanah dan hibah.

FAKTA
Pengurusan wasiat tidak terhad kepada individu beragama Islam semata-mata